

【神州】

參觀大連旅順軍港有感

積弱清廷外患多，大連旅順日操戈。

馬關條約投降定，割讓台澎恥辱和。

黃河勝景

黃河九曲過東營，萬里波濤漸治平。

兩岸蔥蘢添勝景，何時俟得濯纓清。

登蓬萊閣

秦皇漢武望仙山，不老長生豈等閒。

海市蜃樓皆幻影，蓬萊閣尚在人間。



↑「走馬陽關那日回」，在甘肅漢長城陽關遺址前騎馬。

走馬陽關

三疊琵琶轉急催，長安送別互傳杯。

風沙萬里迷望眼，走馬陽關那日回。

登長白山遠眺天池

茫茫渺渺望天池，絕頂登高志未移。

長白山中多險徑，臨危不懼力能支。

瀋陽九一八博物館

憤慨何堪話瀋陽，侵華血債未清償。

松花江畔聞嗚咽，寄望神州弱轉強。

西湖孤雛

孤雛失恃水中啼，乞向遊人為止飢。

同此天涯遊玩客，薄施小食湧泉思。

登黃鶴樓

關山萬里此登臨，黃鶴樓頭極目深。

江漢悠悠今仍在，仙人渺渺費思尋。

他鄉竟作神州客，倦鳥終遊武邑林。

惜別依依回首望，衣襟猶帶白雲心。

與作協文友登長城

長城名字內，遺跡世稱雄。一萬三千里，蜿蜒飛巨龍。

秦燕趙始建，歷代續其工。嘉峪關西起，奔騰鴨綠東。

作協諸兒女，九九陟居庸。秋空何爽朗，疊翠嵩青蔥。

放眼紅塵外，頓覺仙意濃。文人非弱者，陡峭向高衝。

騏驎鼓其勇，踏上嶺千重。健者凌絕頂，歡呼樂其中。

摘取雲一朵，歸來興未窮。



↑「作協諸兒女，九九陟居庸」，作者攝於北京郊外居庸關長城。